

INUIT ATAQATIGIIT

INATSISARTUNI



6. juli 2016

UKA 2016/44

Inatsisartut Suleriaasianni § 33, imm. 1 naapertorlugu Inatsisartuni aalajangiiffigisassatut siunnersuut imattoq matumuuna saqqummiuppara:

Nunarput tamakkerlugu kommunit suleqatigalugit angerlarsimaffeqanngitsunut angerlarsimaffiugallartussanik 100-nik sanaartornissaq qulakkeeriarlugu siunnersummik aningaasaleeriaatsimik imaqartumik kingusinnerpaamik UKA 2017-imi Naalakkersuisut saqqummiussinissaat pillugu Inatsisartuni aalajangiiffigisassatut siunnersuut.

(Inatsisartunut ilaasortaq Mimi Karlsen, Inuit Ataqatigiit)

Tunngavilersuut:

Nunatsinni innuttaaqatigiit ilaat angerlarsimaffeqanngitsuunerat akuersaaruminaappoq. Inuit pinngitsoqaratik tamavimmik angerlarsimaffeqarnissaq pisariaqartippaat; angerlarsimaffik toqqisisimanermik inuulluataarnermillu tunisisoq.

Innuttaaqatitta ilaasa angerlarsimaffitsik annaasinnaasarpaat. Ilaat inissaaleqineq pissutigalugu angerlarsimaffeqanngitsuupput. Ilaat inuuniarnermikkut atukkatik pissutigalugit angerlarsimaffiminnik annaasaqartarput. Tarnimikkut napparsimanertik, atornerluisuunertik pissutigalugit immaqaluunniit namminneerlutik illumik attartornermik akiliinissaminnut aningaasanik isertitaqarnissamut periarfissaqannginnertik pissutigalugu.

Kisitsisit Nunatta Naatsorsueqqissaartarfianeersut nunatta inuttaasa 1 procentiisa angerlarsimaffeqanngitsuunerat takutippaat, tassa allatut oqaatigalugu inuit 600-t missaanniittut angerlarsimaffeqangillat. Angerlarsimaffeqanngitsut amerlanersaat Nuummiipput, ataatsimulli isigalugu sinerissamut siaruarsimapput. Angerlarsimaffeqanngitsut pillugit nalunaarusiami¹ angerlarsimaffeqanngitsut pingasunut avillugit allaaserineqarput: a) inisseqqitat, b) angerlarsimaffeqanngitsut, kiisalu c) inissaqanngitsut. Kommunilu isumaginninnermut immikkoortut naliliinerisa kingorna angerlarsimaffeqanngitsut inissamik neqeroorfingineqartarnissaat siunnersuutip matuma siunertaraa, soorluttaaq utoqqaat innarluutillillu inissanut tapiissuteqartarnermut aaqqissuussinikkut aningaasalersuiffingineqarumaartut.

Sanaartukkat taakku kommunini ataasiakkaani pisariaqartitsinerup qanoq annertiginera apeqquataillugu, nunatsinni piffinnut siaruarterneqassapput.

Angerlarsimaffeqanngitsut amerlanerit massakkut ilaqtuttaminni ikinngutiminniluunniit najugaqartarput. Angerlarsimaffeqanngitsut ilaqtuttaminni ikinngutiminniluunniit oqqiffissarsiortut, oqqiffiminnut akornutaasinnaasarput, minnerunngitsumillu inissamik tigusisarlutik.

¹ http://mipi.nanoq.gl/Emner/Viden%20om%20boern%20og%20unge/Projekt_-,a-_Rapportsamling/~/media/DDC286FA3C9841A5B02A96036E8C9698.ashx

Angerlarsimaffeqanngitsut akornanni inoqartarpoq unnuit tamaasa siniffigisinnaasaminnik ujarlertartunik. Issittumi inuuvugut, taamaammallu inuit silami sinissinnaaneq ajorput. Inimik siniffissamik kiattumik isumaginnittooqarnissaa pisariaqarpoq. Nuummi oqqiffeqarpoq inuit unnuiffigisinnaasaannik, taannali angerlarsimaffiunngilaq.

Kalaallit Nunatsinni angerlarsimaffeqanngitsoqartarnera nalinginnaasutut isigiinnarsinnaanngilarput, tamannali pinngitsoortinniarlugu iliuuseqartariaqarpugut.

Kommunit angerlarsimaffeqanngitsunut sanaartukkaminnut aningaasartuutaasa affaasa Namminersorlutik Oqartussanit akileeqataaffigineqartarnissaat siunnersuutigaara.

Siunnersuutikkut saqqummiussakkut aningaasaleeriaatsimik utoqqaat illuannik, utoqqaat innarluutilluunniit angerlarsimaffiinik, suliniutinilu taamaattuni sanaartornerni aamma atorneqartartunik naapertuuttunik Namminersorlutik Oqartussat kommunit suleqatigalugit aningaasaleeriaatsimik pilersitsissasut siunertaraara. Aningaasaliissutit kommuninit Namminersorlutillu Oqartussanit inissianik sanaartorniarnermi qinnuteqarfingineqarsinnaassaaq. Inissianik taamatut siunertaqartunik sanaartorneq nunatsinni angerlarsimaffeqanngitsut inissisimanerannut ikorseeqataassaaq. Angerlarsimaffeqanngitsut innarluutillit utoqqaallu assigalugit inissianik nalinginnaasunik qaammammut naaffeqartumik akilersuinissamut pisinnaanatillu aningaasassaqqanngitsutut inissimasarput.

Angerlarsimaffeqanngitsut inissiamik tunineqarnissaannik periafissaqalernikkut, taakku inuiaqatigiinni akuulerlutik inuulersinnaanerannut peqataaqataasinnaagunarpoq, oqqiffingineqartullu inissamik ajornartorsiuteqalersarnerannik aaqqiissuteqaaqataasinnaavugut.

Taamaalillungalu matumuuna Kalaallit Nunatsinni inuit tamarmik angerlarsimaffeqalernissaannik siunnersuut saqqummiuppara, taannalu pillugu suleqataanissara qilanaaraara.

Siunnersuutip allaffissornikkut aningaasatigullu pisortanut kinguneqaatissai:

Siunnersuutip Namminersorlutik Oqartussanut aningaasatigut kinguneqaatissaani inissianik sanaartornermi aningaasaleeriaatsimik suliaqarnermik kiisalu tassannga suliaqarnermi kommuninik oqaloqatiginninnermi piffissamik atuinermut attuumassuteqarpoq. Tamanna AC fuldmægtigip ukiup affaani sulinerani akissarsianut 250.000 kr-inut missiliupoq, tassanilu piffissaq kommuninik oqaloqatiginninnermut atorneqartussaq aamma ilaavoq.

Siunnersuutip allaffissornikkut aningaasatigullu namminersorlutik inuussutissarsiortunut kinguneqaatissai.

Siunnersuut siunissami atortussanngortinneqarluni aningaasanut inatsisini aningaasaliisoqartalerpat, nunatsinni isorartoqisumi sanaartugassanik pilersaarutinik aallartitsinermut atatillugu, sanaartornerup annertunerulernissaa naatsorsuutigineqartariaqarpoq.

Siunnersuutip aningaasatigut allaffissornikkullu innuttaasunut kinguneqaatissai.

Soqanngilaq.